

سوسة مصر

كتاب اجتماعي ساخر

مصطفى ممدوح

الطبعة الثانية

سوسة مصر

كتاب اجتماعى ساخر

مصطفى محمد

دار ميكانو للنشر الالكترونى

٢٠٠٩

الطبعة الثانية ٢٠٠٩

دار ميكانو

خلي مدونتك كتاب

0167894779

eldaar@mikanoo.com

www.mikanoo.com

أهداء الى...

ای حد قرفته ولسة هقرفة
ای حد شاف ونام على طول
ای حد فکر يتکلم
ای حد قرفان من عيشة

Fak-zanka.blogspot.com

● مقدمة كدة وكدة

يالاً بسِملة كدة معانا ..الواحد مننا بيتعرض كل يوم
لحاجات غريبة جدا فى الدنيا دى على راي المثل
"جات الحزينة تفرح ملقتلهاش مطرح" ... لا لا
قصدى .."الى يعيش يما هيشوف"

المهم..الحاجات فى واحد يشوفها يطنشها ...وفى
ناس بتوفشفها...مبتعرفش تمسك نفسها..زى انا
كدة..علشان كدة ان قولت افك معاكوا زنقتى
..ومحشش يبفهمنى صح...قصدى غلط

يعنى مالاخر كدة... احنا هنتكلم عن كل حاجة مش
عجبانة ...سياسى اقتصادى اجتماعى ...حتى ثقافى
...وطبعا الثقافى هى الثقافة المعروفة...علشان لو
واحد نيته مش سلكة ولا حاجة
بس واحنا على البر كدة اللى بيخاف يروح...علشان
احنا مش هنسيب حد فى حالة ...واحنا بالصلاة
عالنبي كدة...مبيهمناش حد..لاتقولى حكومة ولا امن
دولة..ولا حتى السى ان ان ...مع ان السى ان ان

ملهاش دعوة بحاجة بس برضة ... احنا مبنخافش
من حد ... ولو استعانوا بالمارينز الامريكاني كمان ...

ملحوظة: اى حد تبع المخابرات وأمن الدولة... ياباشا
انا بهزر ..ومتاخدش على كلامى..دى لزوم الرسم
بس... على اساس ان انا"ليوناردو دافينشي"... وانا
بحب الحكومة... وبلادى بلادى لكى فرخة عند مراتى
...ابقوا عدوا خدوها ياباشا

نرجع لموضوعنا ...الى عايز يبقى معانا ...يقول
احنا معاكواللى مش عايز يبقى معانا...يقول
برضة احنا معاك
وكلة يفك معانا...يالان نطلع الشحنات اللى جواك
...لان الموجب لوجة مع السالب هيقفشوا.

• نبدأ بحريم بلدنا

والله انا مكنتش عارف أبدأ معاكوا ...بأنهى
موضوع...بس الصراحة قلت أبدأ معاكوا عن
البنات...نتسلى عليهم شوية
طبعا من غير ما حد يزعل...واللى عنده اعتراض
يتكلم...لان احنا هنقول اللي موجود فى حياتنا بالظبط

طبعا احنا الرجالة المفروض علينا ان احنا نغض
بصرنا...يعنى كل واحد منا..يلم عينة ..ويمشى من
سكات
دا طبعا ...دونا عن انة دة يعاكس او يتحرش او اى
حاجة من دى

انا بقى قولت خلاص الواحد لازم يلتزم ويلم نفسه
شوية...نزلت الشارع وقولت أبص قدامى لقيت
واحدة..امت جاى باصص جنبى على اليمين لقيت
واحدة تانية...بصيت على الشمال واحدة تالته...لقيت
وشى وراجع للخلف لقيت عشر وحدات قولت
مبدهاش بقى...ابص فى الارض واللى يتخبط بقى
مليش دعوة بية
بصيت فى الارض...مشفتش واحدة...بس شوفت

كوارع ماشية...ياجماعة حد يشيل الكوارع دى
مفيش فايده

جيت ارفع راسى لفوق وقول "يارب خدهم
وريحنا"..لقيت واحدة وقفة فى البلونة

يعنى من الاخر انت محاصر...يعنى محاصر
الحل الوحيد فى الموضوع ده...ان انت تقفل
عينك...وتمشى...وهات عيل صغير يشدك

المشكلة بقى ان مش دى المشكلة...انت لو فى واحدة
ماشية قدامك باحترامها...ولا بس لبس محترم هتقول
ماشى

مش هتركز فيها...وهمشى بأحترام
اما لما تلاقى واحدة لابسة بنطلون ياجدع...مش
عارف والله مدخلة ازاي...اعتقد انهم بيستعملوا
الصابون علشان يدخولة

دا طبعا..غير الاستعانة بصديق بقى
وبالجيران...وخدى يا ام فاروق شدى معانا...
بس بجد هما بيتعبوا جامد...دا ده بس علشان يلبسوا
البنطون...دا غير طبعا الحاجات التانية
الباضى..وغيرة..لا واية البناطيل فى النازل

..والباديهات فى الطالع
طيب البناطيل فى النازل و عرفنا لية ..جايز تكون
تعبت من تطايح البنطلون...فبتوقفة لغاية حد معين
طيب الباديهات فى الطالع لبة... هو انا استنتجت
استنتاج..بس مش عارف هو صح ولا غلط
ان يمكن عندهم ازمة اقتصادية زى بتاعة امريكا
كدة...فبتلبس لبسها القديم

لا وكمان...دا غير المكياج اللى هى بتحطة...لو هى
رايحة الجامعة مثلا..وعندها محاضرة الساعة ١٢
الصبح تصحى من الساعة ٥ ..تصلى الفجر
وتبتدى...تقعد تحط مكياج...على اقل تقدير ٤
ساعات دا يوم لما تبقى مكروته فى شغلها...وربنا
يستر بقى لما تشتغل بأتقان
واحنا طبعاً مش هنتكلم عن التصليح اللى بيحصل فى
الحممات وكدة

داغير بقى البتاع اللى بيلبسوة فى
رجليهم...بيمسروا فية مسمار وينسوة طالع
ويمشوا بية فى الشارع
ولو سألت واحدة اية دة ..تقولك دة كعب...وانا اللى

فاكرة مسمار
والله يبيقوا صعبانين عليا...لما يبيقوا ماشيين
بية... انا نفسى بتعلها سلف
والله الجماعة دول بيتعبوا جامد...والمشكلة انهم
بيتعبونا معاهم...

دا بالنسبة لو البننت لبست بنظلون...طيب لو بتلبس
جيبه بقى بعد التعب اللي بتشوفة فى البناطيل...تلبس
جيبات..وخلص

وتلاقي الجيبه بتطور "التطوير الطبيعى للحاجه
الساقه" الجيبه اول ماتلبس ..تلاقيها طويله كده
...ومحترمة وزى الفل

شويه شويه تلاقي الجيبه قصرت...وبقت حالتها
حاله...بس لابسه تحتها بووووووووووت
الواحد يقول خلاص ماشى ياعم مفيش مشكله بدل
فى بوت فجأة...تلافي البوت اتقلع...تقول مش
مشكله حته صغيره من الرجلين مفيش مشكله
بعد شويه تلافي الجيبه طلعت كمان شويه...وتحتها
بتاع كده لسه معرفتش اسمة لغاية دلوقتي بس
مسيرى اعرفه...المهم البتاع دة اتشال خلاص
والجيبه لسه زى ما هية...

بس كدة الموضوع طول..قصدى كبر

دى اخر تتطور للحاجة الساقعة...مش عارف بقى
هيوصلوا بعد كدة لأية اللى يضيقك بقى ..انهم
رجليهم مش حلوة علشان قاعدين فرحانين بيها كدة.

• شباب بلدنا بقى

شباب تعبان اى والله الشباب مش عارف اية اللى
حصلة اليومين دول...الواحد من الشباب تلاقية
ماشى مش قادر يصلب طولة الله اعلم من اية..ومش
هنفسر اكثر من كدة

تلاقى الواحد من دول ماشى لابس قميص... عادى
يعنى..بس قميص اية....مفهوش ولا زرار مقفول
مش عارف وماشى مبيئلى...شعر صدره..وقاعد
يعنى...شعر صدرى بخير...شعر صدرى طويل
وفاكر نفسة جابر حسنى...المشكلة انة ماشى فرحان
اوى بنفسه

ويعينى بقى على البنطلون الساقط دة...مع العلم
البنطلون..واسع يعنى مش زى البنات...قاعدوا
يشدوا لغاية ما هقوا...لا دا واسع جاهز...بس يمكن
عشان...انة واسع..فبيسقط ولا حاجة والحزام مش
ماسك كويس...ولا حاجة...المهم يبقى ساقط لنص
رجلة.. دا غير بقى شكل البنطول...الموضة
الوقتى...ياما بنطلون مقطع...ياما مرقع..ياما مزيت
ياما مليون جيوب...والفاضى خالص ودة اللى بيلبسة

المحترمين... البنطلون الديرتى (القدر يعنى) ودة اصلا
الموجود فى السوق... يعنى مش هتلاقى بنطلون عدل
خالص

طيب بالنسبة للمقطع.. واحد زىي فاهم المقطع انة
موضة.. واحد غيرى يفكر انة غلبان طيب انا
هحكيلكم قصة واقعية حصلت ... واحد راكب
المكروباص... ولا بس بنطون مقطع.. وقميص منسل
وقاعد جنبه راجل كبير... المهم... جة وقت
الحساب... فالشاب جة يطلع فلوس... الرجل اللي قاعد
جنبه قالة لا والله... مانت دافع.. انا اللي
هحسبك.. يارجل يهديك يرضيك.. مفيش فايده ...
اتارى الراجل فاكرة غلبان.. ومش عارف حتى يخيط
البنطون بتاعة.. ولا بس كدة وذاهب لطلب
العلم... فحب يساعد بكدة
والدروس الاستفادة من هذة القصة انك يوم اللي
مبيقاش معاك فلوس... هات بنطلون مقطع... واقعد
جنب.. راجل كبير كدة ... علشان يحسبك

لا والشعر بقى ... طويل.... وطالع ل فوق.. عامل زى
اريا... تقولة دا اية دة يابنى يقولك.. دا بيحيب الاف

ام... علشان يشغل برنامج... انا والنجوم وهواك
مباشر على دماغة... عقبال مايركبوك... دش
...وتجيب البيت بيتك

طيب سيبك من شكلهم..وتعالى نشوف فكرهم...فكرة
اية يابا..ياحسرة عليها ياحسرة عليها..استخدام
نظام" هيس هيس...علشان تبقى شاب كويس" بقى
كل واحد ماشى مفيش فى دماغة غير خمس حاجات
بنات وبنات وبنات واغانى واغانى انا مش عارف
والله اية الحكاية دى...ولما تلاقى اتنين قاعدو مع
بعض شوفت البنت مش عارف اية...والبوم
عمرودياب الجديدة امتى..هما دول الحاجتين اللى
بيتكلموا فيهم

على راي المثل "الشاب لو راح الجامعة يجب لاهلة
الموزة" والله انا لو قعدت اتكلم عن كل حاجة...يبقى
عايزلى كتب...بس هتعمل اية بنات كدة وشباب
كدة..احنا بجد هنصحى امتى مش عارف والله ربنا
يستر علينا بجد.

• وعندك واحد فلانطين

واحد: هابى فلان طين
انا: وانت بالصحة والسلامة
نفس الواحد: هابى فلان طين
انا: ممكن تلاقيه فى الصيدلية اللي جنبنا
برضة نفس الواحد: يا عم هابى فلان طين
انا برضة: يا عم مش عندى منة.. وانا اعمك اية
يعنى... اية وجع الدماغ دة

دة حوار كان بينى وبين واحد... مش عارف اية
ياجدع اللي طالع على الناس دة... كل ما امشى فى
الشارع.. الاقى واحد يقولى
هابى فلان طين... ابص فى كل حطة... الاقى هابى
فلان طين... اية يا جماعة فى اية... انا افكرتها.. فى
الاول..

ترجمة مرجان بيحب جيهان... واحد معقد كاتبه ولا
حاجة... لا ومش بس كدة

الدنيا حمر اaaaaaaaaaaaaaaaaaaaa... احمر منها
مشفتش... والناس حمر اaaaaaaaaaaaaaaaaaaaa... وتلاقى واد
محمر ماشى مع بنت محمرة
على اساس انى بحمر شيبسى... حتى انا فاكرتة

اعتصام لناس اللى بيخطفوك... علشان تتبرع بالدم...
تلاقى الواحد واقف جنب عربية التبرع بالدم... ياباشا
اتبرع معنا بالدم... لا والله لسة متبرع قريب
بس التبرع مفيد ياباشا... والله ياباشا انا معدش
عندى.. غير ليتين ماشى بيهم... وهما اللى
هيروحونى

يقولك اتبرع بواحد وروح بواحد... على اساس انها
خياره... هديلة واحدة وانا واحدة
ميسكوتش خالص الا لما تجييلة كل الامراض اللى
فى الدنيا... تقول انا عند السكر وفيرس سى.. الخ
علشان يقتنع بقى

نرجع لموضوعنا... انا طبعا قولت لازم اعرف اية
الموضوع الحمار- بفتح الحاء.. ودماعك مترووحش
لبعيد - اللى ماشى فى البلدة
لقيت اخ احمر ماشى مع اخت حمرا.. ووقفتم
وقولتلمهم... هو حضرتك لابسين احمر لية النهاردة
لقيتة بيبوصلى... باستغراب كدة.. ويوقلى... ياراجل
مش عارف... لا مش عارف الصراحة.. عاملين
اضراب ولا حاجة؟؟
حكاية الاضرابات اللى شغالة اليومين دول... لقيتة

اتبعت... نحتفل بية... ياراجل بلا كلام فاضى
وكل واحد ماسكى بدوب... قدة.. وماشى .. رايح فين
ياعم... رايح الفلانطين

وفى الاخر بقولكم ... هابى مصطفى داى... دا اليوم
بتاعى دى

وهنعملة يوم ٢٠ فبراير ٢٠٠٩ احنا خلاص
هنغيرة... وهيبقى دة

بس فية فرق انا مش بجوز حد من ورا
الحكومة... ولا انا اعدمت... انا لسة حى وكويس
وهنعملهولكوا اجازة... بس لو بقى اجازة
صحيح... انتوا هتقبلوا فى الجامعة ازاي... خلاص
مش هنعملة اجازة

هنعملة دراسة ومحدث يحضر... كلة يسكشن
برة... والمراد بالسكشنة فى الجملة
.. هو... بقولكوا اية ... انت شاغل دماغك لية ياعم كبر
تعيش.

• ناس عايزة الحرق

حاجة غريبة جدا جدا.. تيجي تبص يحصل تفجيرات
فى اى حته... فى العالم العربى او غيرة
كل واحد متضايق من واحد يطلع ويقول اسم اللى
متضايق منه... وهيصة

كل واحد يطلع يقول الجماعات الاسلامية.. ومش
عارف اية... انا مش عارف اية اللى بيحصل دة والله
المشكلة بقى ان امريكا تقول الحاجة.. احنا نكرر
وراها.. زى الهطل كدة

يعنى المسلمين ارهابين... احنا نطلع ونقول اللى
يعتبروا بيمثلوا الدين ارهابين
يعنى لو افترضنا ان واحد يقولك انت حمار.. تمشى
فى الشارع وفرحان اوى... انا حمار.. انا حمار
اهو احنا بنعمل كدة... احنا ارهابين احنا
ارهابين.. وفارحانين اوى

عمرنا ماسمعنا... ان فى واحد طلع وقال اللى عمل
حاجة زى دى يهود مثلا
اصل اليهود بيحبونا.. وعمرهم مايعملوا كدة فينا.. اما
المسلمين فهما بيكرهونا
دة باى معنى واى منطق... ياناس بجد حرام عليكم

مع ان اليهود دى صفاتهم على مر التاريخ..مش
حاجة جديدة عليهم.

الا مسمعتش يوم واحد طلع وقال ال ١٥٠٠ اللى
استشهدوا فى غزة فى الحرب الاخيرة
من المدنيين ان دة ارهاب...مفيش واحد طلع وقال
كلمة واحدة من دى
لية القتابل المحرمة دوليا..اللى استخدمت فى الحرب
على المدنيين ..لية مسموش ارهاب؟؟
هل الارهاب كلمة قالها اليهود واعدأنا على المسلمين
..احنا نردد وراهم وخلص..حاجة بجد
انا بجد مش عارف اقول اية ولا اية ..الكلام كثير

حاجة تانية ...سمعنا من شوية ان اليهود الصهاينة
الكفرة سبو سيدنا وحبينا محمد صلى الله عليه وسلم
وسبوا سيدنا عيسى عليه السلام...واتهموا السيدة
مريم العذراء بالزنا هولاء هم اليهود طول عمرهم
...ليس لهم ملة وليس لهم دين وليس لهم عرف
..انا لا الومهم قبل ان اللوم انفسنا...فاحنا اللى
خليناهم يعملوا كدة
لانهم شايفين اننا هان علينا الدين...فلم يحترمواهم

هم... فاللوم ليس عليهم فاذا لم نعتز بديننا... ولم
نطبق سنة نبينا... واتجهنا الى فكرهم وعقائدهم
اخذنا فكرهم فى كل شئ صغير وكبير... وقلدناهم
تقليد اعمى فنحن الذى قال فيهم نبينا رسول الله
صلى الله عليه وسلم "...حتى اذا دخوا حجر ضب
خرب دخلتموه" ياجماعة بجد حرام عليكم .. هنبقى
كدة لأمتى... هنبقى كدة فى قاع الامم لأمة
فالامم لاترتقى الا اذا كان عندها عقيدة متمسكة بها
وفكر خاص بها واحنا عندنا الاسلام... فلماذا لاناخذة
ونتمسك به .. فهم يتمسكون بباطل.. ونحن لدينا الحق
فلماذا لانتمسك به... ونبينة للناس... ونقول للناس
بصوت على ... هذا هو دينى .. هذة هى عقيدتى
هذا هو رسولى وحبيبى ونبى

لية لغاية دلوقتى مقتنعين ان حرب اليهود على
فلسطين حرب سياسية .. او حرب على الارض
بل انها حرب على الاسلام ... هى حرب
دينية ... عقائدية ... وانا لله وانا له لراجعون

• الانسان اصله ورقة

أختلف العلماء والجهلاء واللى مبيفهموش حاجة
على اصل الانسان...ومفيش حد رسى على حاجة
واحدة ..واحد قالك ان الانسان اصله قرد..ودة حاجة
ترجعة ..كل واحد حر اصله قرد اصله معزة ملناش
احنا دعوة

وواحد قال ان الانسان أصله جلدة حنفية ... عادى
برضة جلدة جلدة...كل واحد حر
احنا فى عصر الحريات ...عصر البتجان
والبطاطس..ورغيف العيش

كل دة لحد ما ظهر العالم الجليل المحترم المبجل اللى
هو انا طبعا... (من غير فشخرة طبعا)
الى الوصول الى هذة الطفرة اللى هتغير
العالم...الاكتشاف الرهيب بتاعى إن

===الانسان اصله ورقة===

وطبعا الكلام دة مش كلام وبس ..دة كلام بأدلة
وبراهين ..وبعد علم وافى..ودراسة ملهاش حل

دراسة دامت حوالى ٥ دقائق بحالهم طبعا انتم
حاسين مدى المعاناة..الى انا عانتها ..فى اكتشاف
الموضوع ..المهم...بقى ندخل فى الموضوع..ياللا
ادخلوا برجليكم اليمين

الدليل الاول

طبعا انت دلوقتى عارف ان انت لو جتلى وقولتلى ان
انت عايش..فى الحياة ..مصدقكش ..
الا لو لقيت معاك...شهادة ميلاد.. او اثبات وجود فى
المجتمع زى البطاقة...
يعنى انت لو طلعتك شهادة وفاة ...وانت
عايش...اصدقك ..ولا اصدق الورقة
طبعا اصدق الورقة ...يبقى انت بقيت مجرد ورقة

الدليل الثانى

انت لو اخدت كلية والشهادة بتاعتك اتحرقت ..انت
ليك لزمة...ولا ليك اى لزمة
حتى لو عملت عمل وعلقتة فى رجل جمل
او حتى احسن واحد تعرف اى حاجة فى اى
مجال...بدل معاكش ورقة تثبت انك بنعرف ..ملكش

لزمة برضة

الدليل الثالث

اعمل اى حاجة من غير ورق ..يبقى ملكش

لزمة...مينفesh تتجوز من غير ورق

مينفesh تطلق من غير ورق...مينفesh تتلكم من

غير ورق..مينفesh مينفesh

كفاية كدة ادلة وبراهين...يبقى هنوصل للأستنتاج

النهائى

أن انت ورقة

كما قال فيكارت "انا ورقة اذن انا موجود"

وطبعا اول من شجع الموضوع دة فؤاد المهندس الله

يرحمة..لما طلع على البرج وقعد يقول

انا ورقة ..انا ورقة ...ودة طبعا قبل الاثباتات اللى انا

عاملها

وطبعا انتم عارفين المثل المعروف اللى محدش

يعرفه

"لو لم اكن ورقة لوددت ان اكون كشكولا"

يال ياورقة منك لة

• عانس وعايزة تتجوز

كان قبل كدة فى قديم الزمان يعنى .. الجواز دة حاجة
عادية .. مكانش حد بيتكلم فية
لانة مش أمر اللي عايز يتجوز يروح يتجوز .. وكان
الواحد يلزق فى دماغه انة يتجوز يدوبك اسبوع
ويكون متجوز

مش يا عيني علينا احنا النهاردة .. الواحد يفكر يتجوز
من ساعة ما ينزل من بطن امة
علشان يدويك يتجوز على سن ٣٠ سنة
بقى الجواز الناس كلها بتتكلّم فية .. وبقت مشكلة
الجواز .. موجودة فى كل بيت

الناس لغاية دلوقتى مش عارفين اسبابه اية .. بس
هما بيحاولوا يعرفوا - الحمد لله -
يعنى السبب الشباب .. ولا البنات .. ولا الحموات
.... ولا الحكومة .. ولا اية بالظبط

تعالو نشوف مع بعض

الجزء الاول : عريس يابوى اقتلة بس متموتوش

بقى نظام معظم البنات الوقتى .. وهدفهم السامى اللى
معظم البنات بيفكر فيه... كيف توقعى عريسا

طبعا فى كذا طريقة للمواضيع دى .. الظاهر بياخدوا
قرصات فى كدة
الطريقة الاولى .. كيف توقعين شابا بأن يكون عريسا
لكى؟؟

اول حاجة تتعرفى على واد حلو كدة
ومقطقط... وياسلام بقى لو شكل مهند.. ولا هانى
سلامة انتى بقى وشطارتك.. وياسلام بقى لو عنده
عربية وطقم صوت
ومتريش كدة .. هو انا لسة مفهمتش يعنى اية
متريش.. بس اعتقد انها
ياما على راسة ريشة .. او هتدورلها على فرخة.. ولا
اقولك ديك احسن
ودة طبعا فى الجامعة او فى ولاد الجيران او اى حد
بتاع توك او غيرة
ودة فى الاخر بيطلع على فشوش

بس هى طبعا مش ساكتة .. برضة حاطة احتياطات

ونظم تانية

الطريقة التانية :: ووجع الرجلين
كل يوم على الله تلاقى البنت من دول واخذ امها
وماشين على فين
قلبين البلد راس على عقب - ومحدث يسألنى على
الكلمة اللى فاتت دى
بس المهم واخدين البلد كعب داير - جايز واحد يقابها
فى الطريق يُعجب بيها ولا حاجة
وامها يعينى اللى مظلومة معاها فى الموضوع دة

الطريق التالثة :: الافراح
اتضح ان نسبة النساء فى الافراح اضعاف مضاعفة
عن نسبة الرجالة

واثبتت الدراسات حاجات كتير فى الموضوع دة
١- ان فى ناس مش مدعين فى الفرحة بيحوا غتاتة
يعنى

٢- ان كل واحدة جايبة قرايبها وقرايب قرايبها
وقرايب قرايب قرايبها .. وهكذا
وتلاقى الكل طالع على المسرح ... بيقولوا انهم
بيسلموا على العروسة بس دول بيسلموا على

العروسة مرة واثنين وثلاثة
وبالذات بقى لو الكاميرا مجتش عاليهم .. يطلعوا
ويتفقوا مع الراجل بتاع الكاميرا انة يجبهم طول
الشريط .. العروسة مبتطلعش فى الكاميرا الا قليل جدا
.. ماخلاص هى اتجوزت الدور ولابقى على

وخذ كثير من كدة

البنات عايزة تتجوز ليهم حق
وكمان الشباب عايز يتجوز برضة ليهم حق
طيب دى بعض الحاجات اللى البنات بيعملوها علشان
يتجوزا

• شباب عنس خلاص

احنا بصراحة شوفنا البنات كانوا بياخدوا بالاسباب
.... علشان يتجوزو
هى اة اسباب مبتجيش حتى قطة ... للجواز .. بس
هنعديها

طيب الشاب بقى ... يعمل اية علشان يتجوز
الشاب علشان يتجوز... هيدور على عروسة .. امال
يعنى هيدور على فرخة

كانت قبل كدة البنت لما تتولد .. تقوم واحدة عندها
عيل صغير .. تقولك البنت دى لمحمد ابنى
يعنى بتحجزلة عروسة ... وهو لسة فى اللفة .. دة
طبعاً كان زمان .
الوقتى طبعاً بقى العكس البنت هى اللى بيحجزلها
عريس من صغرها

الواد لما يكبر برضة مبيتعشق .. يعنى انا مرة كنت
جايب دعوة فرح واحد .. لناس جيرانا
فانا بعطى الدعوة لبنتها .. ولسوء الحظ .. بنتها دى

قدى ..فلقيت امها ...طالعة علشان تقولى عقبالك..انا
قومت عامل فتك..وقلتها عقبال بنتك يا حاجة وقمت
جاية ردة بسرعة..انت وهى فى يوم واحد
ياحبيبى..بصراحة انا سكت..وخذت ديلى فى سنانى
قولت يافكيك

يعنى من الاخر ...هتتجوز هتتجوز يا حبيبى...مفيش
مفيس ومن يومها معتش بوزع دعاوى .

طيب نعمل اية يا جدعان ...تخلع من عروسة تلاقى
التانية..من جميع الجهات

الشاب بقى على قد حالة ..عارف البير
وغطاة..وعارف انة عاوزلة كام سنة على مايتجوز
فى الاسعار اللى تخلى شعر الواحد يشيط...والمهور
والبلاوى

فبيقعد يقرف فى نفسة وخلص...ونظام عيش
حياتك...لغاية متعرف تتجوز
يعنى لقيتلك بنت..تمشى معاها فى الجامعة...ولا هنا
ولا هناك...امشى..وحب...واعمل اللى انت عوزة

وساعة الجواز... شوفلك واحد قريبتك علشان تبقى
ضمنها... علشان تتجوزها
دة فكر معظم الشباب

طيب واللى المحترمين من الشباب بقى.. واللى يقولك
حرام تظلم بنت معاك.. وانت مش هتجوزها.. دة
بيقعد يهرى فى روحة وخلص... يعنى يقعد مع
اصحابه

يا جماعة احنا عايزين نتجوز... البلوزات فى الطالع
.. والبناطيل فى النازل
والواحد تعبناaaaaaaaaاان .. من الحاجات دى.... عايز
اتجوز .. دة اللى بيتكلموا بس...

دا حتى فى واحد صاحبي .. كل مايشوفنى يقولى عايز
اتجوز مرة كنت بصلى الجمعة.. اول ما الخطيب
نزل.. من على المنبر.. لقيتة بيقولى
بقولك اية... قولتلة اية... قالى .. انا عايز اتجوز
رديت عليه وقولتلة ... وانا كمان

لغاية دلوقتى وصلنا لكذا حاجة
البنات عايزة تتجوز... والشباب عايز

يتجوز... والامهات عايزة تجوز بناتها

لسة موصلناش .. مشكلة الجواز.. والغنوسة جاية
منين

احنا قولنا كل حاجة فى الجواز حلوة
فى المرة الجاية هنقول المشاكل اللى بتواجه
الجواز.. وازاي نحلها مع بعض..... علشا نشوف
زتونة الموضوع

• مشاكل الجواز ياناس

المشاكل اللى بتواجه الجواز

١- نسبة العنوسة فى مصر وصلت اللى ١٥ مليون
عانس دول طبعا غير البنات اللى لسة
معنسوش..ومتجوزوش وكمان قرات لسة النهاردة
ان نصف عوانس مصر معاهم ماجيستير ودكتوراة

٢- ان البنات ضعف عدد الرجاله يجى مرتين تلاتة

٣-ان البطالة سبب من اسباب عدم شغل الشباب مما
يؤدى الى عدم قدرتهم على الجواز

٤-المهور العالية جدا اللى بيطلبها امهات البنات
بالذات..وشقة على النيل..وشبكة مش عارف بكام
الف دبور..والقايمة ومؤخر صداق دا غير الفرح
يبقى فى قاعة ٥ ستار ولازم ام كلثوم تيجى تغنى
تقوليلها يا حاجة ام كلثوم ماتت تقولك مليش دعوة
انا عايزها تغنى فى فرح بنتى

٥- البنت مش عايزة تتجوز اى جوازة لازم الاول
تقعد تحب واحد خمس ست سنين على مايفهموا
بعض ويشوفوا ينفعوا يتخطبوا لبعض ولا لأوعمتا
فى الاخر حد منهم يقول للتانى انا اكتشفت ان احنا
منفعض لبعض ...ياحبيبي ..لان تفكيرنا مش
متوافق.. مع بعضة ..وقاعدين خمس سنين يدرسوا
بعض.. عامل زى اللى رايح يشتري جوافة كل نص
الجوافة اللى عند الراجل وفى الاخر قلة والله الجوافة
مش عجبانى يااحاج

٦- دا غير كمان الشاب برضة ..عايز يتجوز ملكة
جمال الكون ويقعد يتك على خلق الله بقى..اهم
حاجة عنده البنت تبقى حلوة..دة اصلا لو عايز
يتجوز ..بس لو بصينا بقى معظم الشباب الوقتى
..مبيحبش يتحمل مسؤولية حاجة ..لا بيت ولا اسرة
..وعايز يعيش حياته

دى بس المشاكل العامة وباختصار شديد جدا..منها
مشاكل بتخص البنات ومشاكل بتخص الشباب
ومشاكل بتخص الحموات ومشاكل بتحصل من

مجتمعنا من فقر وبطالة وغيره...بس احنا قررنا ان
احنا نحلها ولو حتى اللي نقدر نحل اللي فى ايدينا

حل للمشكلات اللي فاتت وهنقسمة ثلاثة اقسام ..

القسم الاول :من جانب البنات..البنات هيعملوا اية
علشان نحل الموضوع دة

١-اختارى جوزك:اهم حاجة علشان تعيش عيشة
كويسة تختار الزوج الكويس ..ودة تنقية ازاي زى
ما قالنا رسولنا الكريم "اذا جائكم من ترضون
دينة"يعنى تختارى الرجل اللي على دين لية ..لان
اللى على دين هيبقى على خلق .هيقدر يحافظ عليكى
وعلى اولادك ..هيسمع كلام النبى على الاقل ..
ويستوصو بالنساء خيرا..مش لازم يعنى يبقى غنى
..وابن ناس..و الشروط الكتيييييبيير اوى.

٢-بطلى صحوبية :نصيحة اخوية من اخوكى الصغير
او الكبير اى حاجة..مبيقاش فى حياتك واحد تحببة
غير واحد بس ..اللى هو زوجك بأذن الله ..وبلاش
ترتبى بحد قبل الجواز..حتى لو انتى متأكدة مية فى

المية انه هيتجوزك .. لان بدل مفيش حاجة بتحكمكم
..متضمنانيش يتجوزيك ..ومعظم الشباب بيقتضى وقته
اليومين دول ..يعيش حياة يومين فى الجامعة
وساعة الجواز يغير نظرتة خالص ..والشاب لما
يلاقى البنت حاجة سهلة فى ايديه ..هينظرلها نظرة
احتقار ...ويضيع معها وقت ..وساعة الجد متلقيش
حد ..وعنده واحدة للمشى وواحدة للجواز .

٣-خليكى كويسة:طبعا قبل كل حاجة لازم تبقى على
خلق ودين كويس .. علشان الطيور على اشكالها تقع
..يعنى عايزة واحد محترم ..شوفى المحترم بيدور
على اية ..هيدور على واحدة محترمة ..والحكم اللى
هيحكم بيه عليكى هى اللبس ..لان دة اول حاجة
الشاب بيشوفة ..وبيحكم على البنت منها .. لانه هو
الشئ الظاهر منها .

٤-كن جميلة حية: جمال المرأة فى مظهرها شئ
نسبى ..يعنى الجمال الخارجى بيختلف من واحد
للتانى ..وطبعا الازواق بتختلف وده من فضل ربنا
علينا ..فلا تتصنعى الجمال ..فانتى جميلة فى نظر
غيرك ..والحاجة التانية اللى بجد بنفتقدها فى

مجتمعنا كثير .. الحياء .. فجمال المرأة في حياتها
... والحياء شعبة من شعب الايمان ... فكُنْ حَيِّيةً في
مظهرك وفي كلامك وف كل شئ فيكى جميل.

انا كنت عايز اخلص الموضوع النهاردة بس الظاهر
مفيش نصيب ولسة لنا موضوع كمان علشان ننقشة
من جانب الشباب والمجتمع .. هنتقابل في الجزء
الرابع ان شاء الله ..

• أخيرا اتجوزوا خلاص

مبروووووووووووك فى واحد اتجواز
..لولى لى لى لى لى لى.. اكيد مش انا طبعاً ..والا مكنتش
قعدت ماعكوا الوقتى واتكلمت معاكوا ..بس اللى انا
متأكد منه انه اكيد فى واحد اتجوز ..واللى اتجوز
اهوة...

ندخل فى الموضوع:-

يااااااا ..اخيرا ..دة بقى اخر موضوع فى
الجواز..مش عارف الجواز مشكلة فى كل حاجة حتى
فى مواضيعها ..بس هنعمل اية بقى لازم نتكلم..كنا
اتكلمنا للبنت انها لو عايزة تتجوز تعلم اية..فى ناس
اعترضت على الكلام وفى ناس وافقت ..نحن نرحب
بالاثنين ..ديمقراطية بقى..هنعمل اية

قبل ما نتكلم عن حاجة بقى لازم نقول حاجة مهمة
فى ناس كتيير متعرفهاش" ان نسبة الجواز اكبر
بكتير فى طبقة الفقراء عنها فى طبقة الاغنياء" ودة
ان دل يدل على ان المشكلة الوقتى مش مشكلة

فلوس بس ولا شباب ولا بنات ..دى ازمة الكل
مشارك فيها سواء شباب او بنات او مجتمع ..لا
الفقر لة دعوة بالجواز ..ولا الغنى لة دعوة
بالجواز.. بس لو لحظنا نسبة الغنوسة عند البنات
وعدم الجواز عند الشباب هنلقياها كتيبيير جدا فى
الطبقة المتوسطة ...واحنا يمكن قولنا بعض الاسباب
فى الجزء اللى فات "الثالث يعنى" بس تعالى نشوف
الحل من عند الشباب يبقى ازاي

هقولك ياعم الحلول اهوة..إبسط ياعم
١-عايز تتجوز بجد؟؟؟:- لو فعلا عايز تتجوز قولها من
قلبك يعنى انوى نية صادقة انك عايز تتجوز فعلا
مش كلمة بتتسلى بيها وخذ بالاسباب اللى توصلك
لكدة متوقليش الوقتى بطالة ولا مهور واسمع كلامى
للاخر اللى عايز يوصل لحاجة هيوصلها بس لو خد
بالاسباب وتوكل على الله ..مش تواكل ..انت اعمل
بس اللى عليك وسيب الباقي على ربنا..وطبعا ربنا
هيفتحها قدامك بس انت لو صدقت النية مع الله

٢-بص للتنفعك:-الوصية اللى وصاها لينا النبى
للشباب وللبنات يعنى دور على البنت المحترمة اللى

على خلق ودين مش بالضرورى تبقى ملكة جمال الكون ..يعنى واحدة مقبولة الشكل ..وطبعا كلنا حافظين حديث النبى .. "تنكح المرأة لاربع لجمالها ولمالها وحسبها ونسبها ولدينها فاذا بذات الدين تربت يداك" يعنى اختار اللى عندها دين لانها هى اللى هتقدر تحافظ على بيتك وعلى ولادك وتربيها تربية كويسة ..وانت تعرف بجد انت لو صدقت النية فى انك تلاقى واحدة لدينها هيتوافر فيها الثلاثة التانين بس اهم حاجة برضة تصفى نيتك .

٣-متلعبش كثير:يعنى متتبعش نظام "قضيها الناس لبعضيها" ..يعنى متقعدش تلعب ببنات الناس وحب و مش عارف اية ..علشان كما تدين تدان ..يعنى هتعمل كويس هتلاقية ..هتعمل وحش هتلاقية برضة ..

٤-متفكرش كثير:احنا الوقتى علشان عندنا فراغ كثير فتلاقينا معظم تفكيرنا فى الجواز ..وعايز نتجوز وخلص ..لا فكر فى حاجت تانية كثير ..مستقبلك ..طموحاتك ..حياتك ..ازاي تظبهم الاول وبعدين الجواز لما ربنا يفتح عليك وتعرف تبقى مسؤل عن بيت وعن اسرة ..ابقى اتجوز ..وبص للجواز

حلوة كدة وخليكى متساهلة فى عملية الماديات دى
.. علشان ابنك يعرف يتجوز هو روخر..روحي
ياشيخى ..ربنا يوقفك ولاد الحلال فى الموقف
ويقعدوكى اربعات ..خلاص بقى احنا هنشحت ولا
اية".

كنا مرة بنسأل دكتور فى الجامعة بنقولة..اية هى
مشكلتنا ..قال :ان احنا عندنا انفصام فى الشخصية
.. يعنى زنقين نفسنا بين " العرف والعادات والتقاليد
" وادى مثال ..قالك لو واحد راح يتقدم لعروسة ..فى
الاول خالص قالوا يابنى احنا بنشترى راجل
..(عُرف)..وبعد ماتدخل وتتكلم وعايزين مش عارف
اية واية واية وشروط ياما ..(عادات وتقاليد) طيب
فى اية راجل وفى اية المطالب اللى بتطلبهم دول

اخيرا وليس اخرا...انا اكتشفت حاجة مهمة جدا ..ان
الحكومة هى اللى مخليا فيها بطالة ..تعرفوا لية
..واحنا صغيرين كانوا بيعلمونا فى العربى والجغرافيا
وغيرة ..ان الجواز المبكر مينفعش ومضر ومش
عارف اية ...والظاهر ان هما لقوا حلها ن يبقى فى
بطالة فالواحد على مايتجوز يكون وصل ٣٠ سنة ولا
حاجة ويكونوا حلوا مشكلة الجواز المبكر..مع ان فى

حاجة .. ان الجواز فى القرى يعتبر بدرى يعنى الواحد
فى القرية ممكن يتجوز وهو عنده ٢١ سنة ولا
حاجة وفى الصعيد كمان .. رغم الفقر اللى يمكن اكثر
من الناس العادية الى حالتهم متوسطة .. او تعتبر
احسن منهم ماديا .

بس الصراحة ان الموضوع مش حكاية بطالة
.. ولكنها حكاية ثقافة مجتمع مش عارف هو عايز
اية .. مش المفروض ان احنا نرمى حل المكلة على
جانب واحد ونهمل كل الجوانب الاخرى .. ولكن كل
واحد مننا مشارك فى عمل المشكلة .. والمشكلة
الاكبر ان كل واحد بيرمى على غيره السبب .. احنا
بجد لو عايزين نتغير .. قبل مانغير الناس والمجتمع
من حوالينا .. نبص لنفسنا ونشوف الحل من جوانا
احنا .. اكيد هنلاقى حل .. سواء شاب او بنت او أم او اب
او اى احد فى المجتمع .. الكل يبحث جواة عن حل
المشكلة من الحتة اللى هو فيها .

• تحرش بس بأدب

كل ما اروح مكان ولا اشغل التليفزيون الاقى واحد
طالع وواحدة وقاعدين يتكلموا عن قضية مهمة جدا
هى التحرش

وطبعا يعينى الراجل اللى غلطان ولا الست...وفى
التليفزيون نسمع الاراء.

معانا اتصال تليفونى ونقول الووووووووووووووو

فتحى(شاب): الو.. مساء الخير .. انا احب اتكلم فى
الموضوع دة بصراحة..الشباب بصراحة مظلوم
..يعنى احنا نعمل اية ياجماعة واحدة ماشية لابسة
من غير هدوم ..وانا احاسيسى ومشاعيرى بتطلع
بقى وانا الصراحة مبعرفش امسك مشاعيرى ..هما
يعنى لازم يلبسوا ضيق ومحزق ويتعبونا معاهم
..احنا شباب مش عارف يتجوز يعمل اية بقى
..بيسلى نفسة بدل ما هو قاعد ملوش لا شغلة ولا
مشغلة ..يعنى يافندم انا ببقى قاعد فى أمانة الله على
القهوة ..لقيت واحدة معدية لابسة مش عارف اية

واية ..ومش عاملة احترام ليا وانا قاعد.. أسكت يعنى
..لازم اعمل اى حاجة اهى حتى لو حد سألنى اقولة
انى لقيت شغل ..الوقتى بعاكس ..اترقى شوية ابقى
متحرش...لغاية مابقى رئيس المتحرشين فى
المنطقة..وبعدين ياباشا احنا بنعمل كدة
لمصلحتهم..البنت من دول لما تقعد تتعاكس ويتحرش
بها ..وكدة تروح تلم نفسها وتلبس محترم
طيب دلوقتى البنت بتبقى لبسة محترم وبيتحرش بها
هى كمان؟؟

فتحى(نفس الشاب):لالالالا...حد الله بينى وبين
الحرام ..البنت المحترمة تمشى ..عمرى ما
اعكسها..دى زى اختى (على اساس الثانية بنت عمه
(واللى مرضهوش على اختى مرضهوش على غيرى
طيب معانا اتصال من فتحية ونقول
الوووووووووووو

فتحية (فتاه):لوسمحت احب اقول حاجة ..ان
الموضوع انتشر جدا ..وبقت حاجة تخنق جدا
..الواحدة تبقى ماشية تلاقى واحد بيتحرش بها..احنا

عملنا للموضوع دة بعض التسهيلات شوية .. علشان
يبطلوا ومفيش فايذة .. يعنى هما يبصوا .. وقولنا
الواحد يبص باحترامة وكمان عملنا خاصية جديدة
انة ممكن يضيف تعليق يعنى يقول يا قمر .. يا غسل
.. (فاكرة نفسها مدونة) واحنا عملنا الموضوع دة لانة
بيرفع من روح البنت "المعدنية" يعنى دلوقتي ممكن
يبص ويقول تعليق .. نعملهم اية تاني .. بس تعمل اية
عالم مبيعجبهاش العجب ولا الصيام فى رجب
... وهما لو تمادوا فى الموضوع دة شوية كمان
هنلغى كل الخصيات الموجودة

طيب بيقولك انة اللي لابسة لبس مش محترم هما
اللي بيتحرشوا بيها؟؟؟

فتحية (فتاة): لو سمحت اللبس دة حرية شخصية
.. يعنى كل واحدة تلبس اللي هي عايزة .. احنا مش
فى عصر الحرية والديمقراطية ولا اية .. وبعدين
اللبس لة تأثير فسيولوجى عند البنت ... مهم برة
بيلبسوا اللي هما عايزينه .. اشمعنى احنا يعنى ..

كل الكلام دة بنسمعة فى كل مكان .. وفى كل برنامج

بيذيع الموضوع دة .. الكل بيقول التانى هو اللى
غلطان

بس قبل ما اقول اى حاجة .. عايز اقول ان نسبة
التحرش فى الولايات المتحدة اكبر من مصر اضعاف
مضاعفة .. علشان عقدة الخوافة اللى عندنا

انا بقى لو قلت رأى هقول ان اللى الاتنين غلطانين
.. والغلط لابسهم من ساسهم لراسهم .. لية بقى؟؟

بالنسبة للشباب ... ملوش اى حق انة يتحرش ببنت
حتى لو لابسة اية .. ويتحكم فى نفسه .. امال راجل
لية .. دا الرجال قوامون
عيب اوى لما تبقى شحط طويل عريض ومتعرفش
تتحكم فى نفسك .. ياعم اعتبرها اختك وعملت حاجة
غلط تنصحها ولا تعمل انت كمان حاجة غلط
زيها .. بدل ماتصونها وتحفظها وتراعيها .. انت اللى
تتحرش بيها.

والبنت غلطانة فى لبسها ومتقوليش هى حرة فى
لبسها لان كل حرية وليها حدود مفيش حاجة اسمها
حرية مطلقة .. فهى لم تحترم حرمة الشارع اللى هى

ماشية فية ... وعايز تمشى فى الشارع كأن مفيش
حد فى الشارع غيرها.. انتى محترمتيش الشارع ولا
الناس اللى فية فمتنتظريش من اللى فى الشارع انهم
يحترموها ... انا مش عارف اية المشكلة لو البنيت
مشت باحترامها.. لابسة لبس محترم... زى الناس
الكويسين .. هيمشوا ينادوا عليها ويقولولها يا
محترمة .. جايز بقت شتيمة اليومين دول .. وانا مش
عارف .. هتنقصى رجل ولا ايد

يعنى انا من وجهة نظرى ان الاتنين المفروض
يتحاكموا .. مش واحد بس .. لان الاتنين عملوا غلط
.. المفروض يتحاكموا عليه
لان الشاب :لم يحترم خصوصية البنيت اللى ماشية .
والبنيت :لم تحترمة حرمة الشارع اللى هى ماشية
فيه .

وارجع واقول تانى .. ان مشكلتنا الحقيقية ... ان احنا
لما نيجى نحل مشكلة نبصلة من جهة وحدة بس
ونهمل الجوانب الاخرى .. احنا بنعمل المشاكل
ونرجع نحل فيها

• البلد عايزة مصلحتك

كل يوم بنسمع مشاكل وحاجات بتحصل فى البلد
.... الكل فإكر أن الدولة باظت طبعا لا لان الدولة

بتعمل كدة علشان عاوز مصلحتك

الجديد بقى ان الدولة هى اللى عاملة بطالة

... هتسألنى طبعا يعنى هى اللى قصدة .. هقولك

طبعا... لانها عاوزة مصلحتك.. أزاى ??? هقولك انا

لان الدولة مش عاوزة تتعب الشباب ... يعنى ترضى

ان انت تفضل تعبان طول اليوم شغل وارهاق وبهدلة

... هى الدولة هتتعبك ازاى يعنى ... دة روحة فيك...

الدولة عاوزاك تنام وتستريح وتصحى بدرى علشان

تنام تانى ... انت اهم حاجة تاكل وتشرب وتنام وتدخل

ال... وبس وتنزل فى السهرة تقعد على القهوة

... ودة كمان علشان القهاوى تشتغل يعنى بدمتك لو

الشباب كلة اشتغل مين اللى هيعقد على القهاوى

.. وتتقفل وكدة هيقطع عيش القهوجى ... ودة طبعا

حراالم .. طبعا الدولة والحكومة بتحب شعبها

وهى كدة ضربت حجرين بشيشة ريحتك وشغلت

القهاوى..

لا ومش بس كدة دا بتاخذ منك الضرائب لمصلحتك
برضة... هتقولى طبعا الضرائب ..وعايزة مصلحتك
هقولك طبعا

هى مش بتاخذ منك الفلوس علشان تصرفها عليك
علشان انت مش هتعرف تصرفها كويس ..ممكن
تبعترها فى اى حاجة ..تفتح مشروع ولا حاجة لا
قدر الله ...فهم خدوها علشان

بستثمر هولك...وتصرفها عليك...انا عارف ان انت
هتقولى بتصرفها عليا فين هقولك انت عندك حق..
بس هى برضة بتعمل لمصلحتك..الدولة عينها لك
علشان الورثة..مش هى لازم تأمن مستقبل الجيل
اللى مش جاى قصدى اللى جاى

الدولة مش عارفة تعمل اية علشان تريحك يعنى
عليها والله بتتعب جدا...ياراجل دا باعت اللى قدمها
واللى وراها ..لدرجة انها بقت على الحديدة..كل دة
لية .. علشان تتمتع انت وتاكل عيش ابو شلن
وتتبسط..لا ومش بس كدة دة استغلت ان الحديد غلى
وباعت الحديدة...مش عارف نودى جمایل الحكومة
دى فين ربنا يخليلنا الحكومة...شوفت الحكومة
بتتعب ازاي...كل دة علشان عاوز مصلحتك
دا يما ظلمين البلد كدة

• حيوانات بلدنا اتلمت علينا

طيور...خنازير..حمير..معيز
الحيوانات كلها اتلمت علينا...حاجة غريبة جدا
..بقينا ملطشة لك حيوان..كل حيوان من دة يعطس
شوية ..البلد تتقلب ..والناس تموت ..كل دة علشان
حيوان اللى يضايقك اية بقى يا اخى....ان الخنزير
عايز يتعالج على نفقة الدولة ..لية فاكر نفسة مين
..ابو الهول

دا ابو الهول حتى منخيرة اتقطعت ..متعالجتش على
نفقة الدولة ..ما علينا

سمعت اخر خبر ..بيقولك هيعدموا كل الخنازير اللى
فى مصرياللا ابسط ياعم ..هتتموت وتستريح من
السواد اللى انت عايش فيه دة

لا ومش بس كدة واحد طالع يقولك ان الخنزير
المصرى احسن سلالة فى العالم..مش فاهم انا
الموضوع دة؟؟

يعنى هيجيلة انفلونزا نضيفة ولا حاجة ...ما الخنازير
كلها بوش ومنخير طالعة لقدام وشكلة اعوذ بالله
ولا يمكن قصدة على بمبة ..اللى بيحى مع تيمون
ياعم فى هاكونا مطاطة

اللى عاملينك فية الخنزير طيب وهو الصح دايمًا
..وهو اللى طيب وابن حلال دايمًا
ولا الاخوة المسيحين اللى طالعين فى مظاهرات
عشان ميدبحوش الخنازير ..ومقدمين طلب للرئيس
والبابا شنودة بكدة
خلاص ومالة هما يكلوا لحمة خنازير...والناس
تموت مش مشكلة ..دى اهم الاخبار بس...
بس انا ملاحظ حاجة غريبة اوى ان مصر بتحضن
اى حاجة فى العالم...شغالة حضانة
يعنى انفلونزا الطيور..تقولك ماشى هات هنا اما
نجربها على الشعب المصرى الاول...جايز يطير ولا
حاجة ..بعدها ازمة اقتصادية ..برضة مسبنهاش
...قولنلها..ولله لانتي جاية عندنا يعنى انتى هتعدى
من جنبان ومتجيش دا عمرة ما يحصل..تعالى بس
اشربى حتى كباية شاي..لا ومش عزومة مراكبية
..عزومة بحرارة
اخر حاجة انفلونزا الخنازير...هى لسة مصر
مستضافتهاش بس يارب ماتيجى يارب
ولا يتعزم عليها بحاجة
اة صحيحخبر عاجل ...ممنوع ركوب عربية

مرسيدس خنزيرة .. لانها ممكن تكون حامله فى
المرض...ومش عارفين هى هتولد امتى.

• الرجالة عقلهم كبير

تصدق بجد كدة..الموضوع دة اكتشفتة لسة
قريب..ان الرجالة عقلهم كبير..انا مش بقول الكلام
علشان اعمل فتنة نسوانجية ولا حاجة والله

بس بجد الرجالة عقلهم كبير..رغم انى مقتنع ان فى
نساء كثير عقلهم بمية راجل(يعنى حوالى طن ونص)
بس انا قولت اجيب التاريخ من الاول كدة لقيت ان
الراجل متساوى مع الست فى كل حاجة ..وان مفيش
تفرقة بينهم ..بس فى شوية مشاكل كدة حرمت
البنات من شوية حاجات ..زى التعليم وغيره..بس
الحمد لله الرجالة سعت لانها ترجع للستات حقها
..واول واحد هو رفاعة الطهطاوى..لما رجع من برة
..طالب بتعليم المرأة

وانها متساوية مع الراجل فى التعليم لكن جات على
دماغنا احنا ..وبنعيط الوقتى بدل الدموع دم ..علشان
هما اتعلموا ...اتعلموا علشان يتفتحوا كدة ويبقوا
تمام ...ازدادوا جهلا اكثر..

المهم.. البنات بقت بتتعلم زى الولد .. علشان تطلع
منهم واحدة ممرضة وطبيبة .. وحاجة تفرح كدة تنفع
المجتمع

فعلا طلع منهم ناس كدة ونفعوا المجتمع لكن فى
المقابل

طلع ناس جاهلة كتير .. ودى سبب مشاكلنا الوقتى

بدأوا الستات يجتمعوا مع بعض (ويعنى على الستات
بقى لما يجتمعوا مع بعض) و عملوا المجلس القومى
للمرأة والمجلس النسوى .. كل دة علشان يطالبوا
بحقوق مش بتاعتهم .. اصلا

وكل دة والرجالة ساكنة ومبتقولش حاجة .. راحوا فى
ثورة ١٩١٩ وقلعوا هدومهم علشان يبقوا زى
الراجل .. اشمعنى الراجل يعنى ماشى قالع راسة .. احنا
كمان لازم نقلع راسنا .. مساواة برضة

بعد كدة عملوا منظمات ودينا وبدأوا يطالبوا بحقهم
فى كل حاجة الراجل بياخذها .. يعنى مثلا .. الراجل
بيشتغل يبقى البنت لازم تشتغل .حتى لو هتقصر فى
بيتها وتربية ولا دها المهم تبقى زى الراجل

وبس..الراجل بياخذ ضعف الميراث ..لا ازاي البنت
لازم تاخذ زية متاخذش نصة ..الراجل ميتجوزش
اكثر من واحدة ..دا انا سمعت واحدة بتقول لشيخ هو
الراجل بيتجوز اربعة ..اشمعنى البنت متتجوزش
اربعة ...((لا تعليق))

الستات خدوا حقوقهم واكثر من حقوقهم ولسة
بيطلبوا حقوق كمان ...وهيفضلوا يطلبوا
حقوق..والموضوع دة طبعا لانهم عندهم نقص ..فى
شخصيتهم..والنقص دة عمرة ما هيروح هيفضل
موجود عندهم على طول ..لانهم بقوا زى الراجل فى
كل حاجة الا فى حاجة واحدة بس وهى ان عقلهم
مش كبير زى الرجالة ...الرجالة مكبرين دماغهم
..من التفهات دى..دا الحق يقال ..ان الراجل هو اللى
مفروض يطالب بحقوقة دلوقتى..حقوقة اللى مسلوبة
منة بس احنا علشان عقلنا كبير ..مبنبصش للكلام
الفاضى دة ونفسنا كل ست يبقى عقلها
كبير..الموضوع دة للستات اللى عقلهم صغير
فقط..اللى عندهم نقص وحاسين ان كل حاجة متاخدة
منهم ...واكيد فى ستات عقلهم كبير ..كتييير..

• وانا بكلم اوباما

رغم انى قولتلة .. خلاص الموضوع خلص..بس هو
برضة مفيش فايده فية.
هقولكوا الحكاية ..انا لما عرفت ان اوباما هيتكلم عن
حقوق المرأة ..زى ما قولتلكم فى البوست اللي
فات..أمت جاى عامل حركة مجدعة ..أول ما جة
اوباما مصر وشغل خط الاتصالات بتاعة ..قمت
متصل بية (مع ان الدقيقة ب ٠ ٤ قرش)قطمة وسط
يعنى ..بس اتشجعت واتصلت..والمكالمة كان شكلها
كدة.

مصطفى: أوباما ..حبيب هارتى

أوباما:تمام الحمد لله ...ممكن اعرف مين معايا

مصطفى: بقى مش عارفنى ياراجل...دا انا كدة

هزعل

أوباما:لا والله معلى اصل ..الارقام على الشريحة

التانية ..ومش واخذ بالى من الصوت

مصطفى:ماشى ياراييس..كبرت علينا بقى..انا

مصطفى بتاع مدونة فك زنقة

أوباما: اة..مصطفىازيك يا مصطفى وحشتنى
ووحشنى موضوعيك الحلوة..انت فين يابنى من
زمان

مصطفى :انا موجود ..بس انت اللى نسيتهى..بقولك
اية علشان معطلكش ..وانا عارف انت جاى ٨
ساعات بس..فاكر موضوع الرجالة عقلهم كبير
أوباما:ايوة..صحيح انا كنت هرد عليك فى الخطاب
بتاعى النهاردة على الموضوع دة ...انت عايز تودينا
فى داهية..

مصطفى ..اسمع بس..انا بعدها نزلت موضوع اسمة
الستات عقلها كبير..واعذرت فية ياعم..وخلص
بقينا اخر تمام..والحريم كلهم انبسطوا منى
...والموضوع انتهى...فمفيش داعى تعمل قلق بقى
وضجة ...علشان هتخلع من هنا ..وانا هترمى فى
المعتقات من هنا.

أوباما:ياخبر لية ياراجل..بس الخطاب اتكتب خلاص
...على العموم انا مش هجيب اسمك انا هتكلم عن
الموضوع بشكل عام ..ومش هجيب سيرتك
خالص..كدة قشطة

مصطفى :خلاص قشطة...وابقى سلملى على هلارى
أوباما..اية احنا مش هنشوفك فى المؤتمر ولا اية

مصطفى: لا ياسيدى مجاليش دعوة ..وبعدين انا لسة
هسافر.. على العموم انا هشوفك من التليفزيون
أوباما: ماشى يادرش ..مع انى كنت عايز اشوفك بس
يالاً خير

مصطفى: المرة الجاية بقى...سلامووووووووز

أوباما :سلامووووووووز

وانتهى الحوار لغاية كدة ... وقفل السكة ..واحد

حدق يجى يقولى " هو اوباما بيتكلم عربى" ..هقولة
ياحدق..دى الترجمة بتاعة المكالمة .

لخسارتنا الجميلة .. فمن اجمل ما قرأت .. ان احنا
عاملين زى الواحد اللي لو ضربة على قفاة حد
ملوش لزمة يزعل اوى ... وطبعا هيردهولة ويمسخر
بكرامة الارض... اما لو ضربة على قفاة شخصية
هامة يبقى مبسوط اوى ... ويمشى فى الشوراع كل
اللى يقابلة يقولة دا هذة الشخصية الهامة ضربتتى
على قفايا .. واعتبر الشخصية الرمة هي
الجزائر.. والشخصية الهامة هي البرازيل
وبعدين جاتلنا الفرصة التاريخية اللي غلبنا فيها
... ايطاليا "اللى هتمنع الحمص عاد يتاكل عندها تانى
" .. ووجدنا البهجة على وجوة المصريين ... ورجعت
لكل فرد انتمأة لوطنة ... الذى لا يظهر هذا الانتماء
الا عندما نكسب مباراة .. على دولة اخرى... فانت ان
لم تشجع مصر .. اذن انت عميل وخائن ... فلما
اتغلبنا من الجزائر.. واحد فرح للجزائر طلع عليه انة
عميل ... مع ان دول يعتبروا زى اخواتنا ... يعنى
عرب ومسلمين زينا .. لكن فى الحالة دى تبقى
عميل.. ونسى "حب لأخيك كما تحب لنفسك"
واللى فرح لإن البرازيل غلبتنا ... دة مصرى اصيل
... وبيحب بلدة ..

فهل اصبح الانتماء للبلد فى حالة الكورة بس
...ياعينى عليكى يامصر وانتى بقيتى مجرد كورة
...مرة تخيب ومرة تصيب...واهى ماشية ..وبعد
كدة ابقى العبى كويس يامصر ...علشان نحبك

• حرامية بلدنا

تعريف الحرامى: هو كائن حى زينا يعيش ويتعايش
وبياكل زينا برضة والعجيب بقى انة بيشر ب
وبيمشى زى الناس.

انواع الحرامية

١- حرامى غسيل... فقري طول عمرى غسيل اية بس
اللى بيسرقة

٢- حرامى حيوان: مش شتمية له ولا حاجة ولكن
اطلق عليه هذا الاسم لانه بيسرق الفراخ والبط
ماشابه ذلك وده فوق الفقري بدرجة

٣- حرامى متطور: وده بقى بيستخدم اساليب جديدة
فى سرقة مائل حجمة وزاد ثمنه من غير ما حد
يشوفة

هما دول بس انواع الحرامية اللى كنا نعرفهم واحنا
صغيرين .. بس يدوبك فات كام سنة .. وطلع اسماء
حرامية جديدة .. وانواع جديدة .. نبدأ من الصغير للكبير
بقى

٤- حرامى بالأكراة: وده مبيطلعش عليك ماطوة ولا
حاجة .. ده بيسرقك بمزاجك .. ويتواجد هذا الكائن فى
المصالح الحكومية .. وهنا يالدفع ياتروح

٥- حرامى نت: ودة كائن متطور مع التكنولوجيا الجديدة.. بيساير التقدم العلمى.. فى المنطقة .. احلى حاجة فية بيسرق عبر الانترنت .. وهو قاعد فى بيته وهؤلاء صنфан

أ- بيسرق حاجات كبيرة .. حسابات بنوك ..
ب- بيسرق حاجات بسيطة .. ايميل او موقع او حساب على الفيس بوك .. اهوة بيمشى حالة .. ودة فقرى متحضر .. مثله مثل بتاع الغسيل بالظبط.

٦- حرامى بلد: ودة بقى الكبير اوى بتاعهم .. ودة بيسرق بلد ولا اتنين ويهرب برة البلد .. يعنى ينصب على شعب مثلا... ولا ياخذ قرد .. قصدى قرض ويخلع برة البلد .. والبلد بقى تقعد تقولة متزعلش .. طيب بس تعالى .. وهنجباك شوكلاتة .. طيب هنعمك مساكن شعبية .. طيب اسرق كمان سريقة .. يعنى هتهرب بكام مليار بس .. هتعمل بيهم اية يعنى .. وتعيش منين .. طيب ولادك زنبهم اية انهم يعيشوا بحبة مليارات دول بس .. وهو مطنش ومش عايز يجى.

• الاحتلال الفلسطيني لاسرائيل

تصدق بالله انا معدتش عارف مين اللي محتل مين
اسرائيل اللي محتليا فلسطين ولا فلسطين اللي محتلى
اسرائيل.. طبعاً انتوا هتستعجبوا .. بس الواقع اللي
حواليك هو اللي واقع يتوة .. ميعرفكش مين الظالم من
مين المظلوم.

خبرين تحت بعض خلونى اكلم نفسى
الخبر الاول: زيادة نسبة تصدير الغاز الى اسرائيل
الى ٥٠% وبنفس السعر
فعلا يعنى اصل انتوا عارفين ياعينى على اسرائيل
دى مقطوعة من شجرة وملهاش حد يمولها واية
يعنى لو نرودلها شوية غاز مهو مرطرط عندنا اهوة
ومش عارفين نودية فى حته والفلوس مش مهم
.. مش الشعب مرتاح اخر راحة .. ومن كتر الراحة
بقى بيكلم نفسة .. وبعدين متنسوش دى جارتنا
.. والنبي وصى على سابع جار .. زود ياعم ليهم كدة
... وخليك كريم كدة وبلاش جو البخل اللي انت عايش

فية دة.. والطب اتقدم الوقتى ..وقال اية المحكمة
طلعت ان تصدير الغاز لاسرائيل لا يجوز ومينفحش
هى المحكمة دى بتفهم حاجة فى السياسة ..ولاتفهم
حاجة فى البتجان .

الخبرالثانى:-اكتشافت القوات المصرية ٨ انفاق جدد
يرسلون منها غذاء لأهل غزة

يالال عار والتار والفار...شوف العالم دى ياجدع
عايزين ياكلوا..مش مكفيهم الاكل اللى اكلوة فى اول
السنة ..ولا هما عاملين زى القبط ياكلوا وينكروا..دا
كلوا ضرب لما قالوا بس..عايزين اية كمان... وشغل
التهريب دة ...بيهربولهم اكل ..مش كفاية كانوا
قاعدين يضربوا طانت اسرائيل..طيب مش عارفين
يهربولهم حشيش ولا بانجوا كنا قلنا ماشى ...مش
يهربولهم اكل ..الحمد لله انهم اكتشفوا الانفاق دى
...لازم نقطع عنهم الماية والاكل والهوا ...وكل
حاجة ..علشان دول عالم متختشيش.

بذمتكوا عرفتوا مين اللى محتل مين اسرائيل اللى
أحتلت فلسطين

ولا فلسطين اللى أحتلت اسرائيل
لو عرفت الاجابة ...متصلش علشان التليفون
اتسرق..بعد موضوع الحرامية على طول

• بورصة التهيس

طرح أسهم جديدة فى البورصة لرغيف العيش وذلك للإكتتاب العام لجميع فئات الشعب وعلى جميع افراد الشعب الاشتراك فى الاكتتاب و سيتم توزيع الاسهم على هيئة ديل فار بداخل الرغيف مع العلم بأن اذا جمعت الفار تاخذ رغفين هدية.

بعد انتحار الكثير بسبب خسائرهم فى البورصة .. قررت الحكومة بزيادة فى الخسائر ليزداد كمية الانتحار الذى يزيد الوفيات مما ينتج عنه تقليل فى عدد السكان .. فتكون قد حُلت المشكلة السكانية.

حدوث مضاربة كبيرة بين الاسهم وبعضها مما ادى الى سقوط ٢٠ جريح منهم ٢ فى حالة خطرة وأيضا تم غلق السوق على صباح أحد الاسهم مما نتج عنه قطع بوز السهم.

عمل اضراب كامل لأسهم الغزل والنسيج وذلك

احتجاجاً على عملية الصكوك وانهم احسوا بأنهم
اتصكوا على قفاهم.

تعلن شركة غاز أبو ماضي بتوزيع اسهم غاز مجانية
مع امكانية التوصيل للمنازل وذلك لغير المصريين.

أما اذ انتقلنا الى بورصة التهيس العالمية فنجد أن
"الجزمة" الاقتصادية اثرت على كل شباشب العالم
وارتفاع تضخم القباقيب وقد صرح الرئيس الامريكى
بصرف قباب لكل مواطن وذلك لضرب البورص
المصرى لانة يقوم بالتحرش بالبورصة الأمريكية .

• جامعة المنصورة وراك وراك

لما تحل فى مادة مية مية ... وتشيلها
يبقى انت اكيد فى جامعة المنصورة
لما تحل فى مادة زى الزفت .. وتقدر فيها
يبقى انت اكيد فى جامعة المنصورة
لما تكون بتشرح مادة لاصحابك .. وتجب اقل واحد
فيهم

يبقى انت اكيد فى جامعة المنصورة
لما تلاقى دكتور معقد نفسيا .. غايّة ان يسقط الطلاب
يبقى انت اكيد فى جامعة المنصورة
لما تجيب كتاب الدكتور وتذاكر منه ... ومتفهمش
حاجة

يبقى انت اكيد فى جامعة المنصورة
لما تجيب ورق خارجى وتذاكرة ... وتفهم المنهج
يبقى انت اكيد فى جامعة المنصورة
لما تختار النجاح والعلم بجد .. وتلاقى كل اللى حواليك
بيفشلوك

يبقى انت اكيد فى جامعة المنصورة
لما تبقى متفوق مادة طول عمرك ... وييشيلو هالك فى
الكلية

يبقى انت اكيد فى جامعة المنصورة
لما تلاقى كلية ..مبتدكش تقدير ..لانك هتدفع اقل لو
جبت تقدير

يبقى انت اكيد فى جامعة المنصورة
لما تحضر محاضرات وسكاشن وتلتزم ...وتفشل
يبقى انت اكيد فى جامعة المنصورة
لما تفكر وتضيف جديد...وكل اللى حواليك عايز
الثابت

يبقى انت اكيد فى جامعة المنصورة
لما تلاقى نفسك قاعد فى مدرج المهدى وحواليك
عشرة الاف واحد

يبقى انت اكيد فى جامعة المنصورة
لما تلاقى الجمال .. هو اقبح شئ
يبقى انت اكيد فى جامعة المنصورة
لما تلاقى العجب والصيام مع سمير رجب
يبقى انت اكيد فى جامعة المنصورة
لما تكون جعان ..تقوم تروح للبلغ
يبقى انت اكيد فى جامعة المنصورة

• رمضان جانا

عندما نتذكر رمضان فى الماضى ..تتذكر الشر اشيب
والفوانيس فى كل مكان ..تتذكر الفرحة التى تراها
على وجوة الناس
تتذكر المحشى اللى مصر كلها بتعملة اول يوم
رمضان

رمضان شهر الصيام
تجد فية افخم الاكل والشرب التى لم تجدها فى
الاشهر الاخرى .. تجد فية التفكير فى الاكل اكثر من
التفكير فى الصيام
فتجد التمر والعرقسوس وتمر هندى والفرزق
والمكسرات والكنافة والقطايف وغيرها من الاكل
الكثير الذى يزداد فى رمضان بل ومعظم لا تراه الا
فى رمضان

رمضان شهر العبادة
ولذلك تجد كل من حولك يساعدونك على العبادة من
مسلسلات رمضان التى اصبحت اكثر من وقت اليوم
بالكامل . فهناك اكثر من ٧٠ مسلسل فى رمضان

...علشان تسلى صيامك ..تجد البنات يتحجبن بوضع
قماشة على رأسهم ولكن هذة القماشة بيأصوها من
بقية هدمهم فتلاقيها اتحجبت من فوق وقلعت من
تحت ... تجد الشباب يقفن على النواصي قبل مدفع
الافطار ليعاكسون البناتوهذة تسلية لوقت الصيام .

رمضان

تجد المساجد قد امتلئت على اخرها فى اول يوم
وتانى يوم ،ثم تبدأ فى التناقص على نصف الشهر ثم
يزدادون فى نهاية الشهر علشان ليلة القدر
..فالمساجد تمتلئ فى حالة صلاة الجمعة وفى
رمضان وفى امتحانات الثانوية العامة .

جأتى رسالة تقول "لا تقل رمضان كريم ...قل
رمضان مبارك"

اعتقد انها اتية من الحزب الوطنى

كل عام وانتم بخير

التعريف بالكاتب

الاسم: مصطفى محمد

العنوان: بيتنا طبعاً امل متشرد

الحاجات اللى ماسكها:

صاحب مدونة فك زنقة

Fak-zanka.blogspot.com

صاحب مدونة ظبط نفسك

Zabt.blogspot.com

رئيس حملة ماشى للطريق الصح

www.mashy.tk

رئيس مجلس ادارو دار ميكانو للنشر

وجروب خلى مدونتك كتاب

الفهرس

الصفحة	اسم الموضوع
٥	مقدمة كدة وكدة
٧	نبدأ بحريم بلدنا
١٢	شباب بلدنا بقى
١٥	وعندك واحد فلانطين
١٩	ناس عايز الحرق
٢٢	الانسان اصلة ورقة
٢٥	عانس وعايزة تتجوز
٢٩	شباب عنس خلاص
٣٣	مشاكل الجواز ياناس
٣٨	اخيرا .. اتجوز وخلاص
٤٤	تحرش بس بأدب
٥٠	البلد عايزة مصلحتك
٥٢	حيوانات بلدنا اتلمت علينا
٥٥	الرجالة عقلهم كبير
٥٨	وانا بكلم اوباما
٦١	مصر هى كورتى
٦٤	حرامية بلدنا
٦٦	الحتلال الفلسطينى لاسرائيل

٦٨	بورصة التهيس
٧٠	جامعة المنصورة وراك
٧٢	رمضان جانا
٧٤	التعريف بالكاتب
٧٥	الفهرس

مؤخرة الكتاب

سوسة مصر ... اول كتاب الكترونى

سوسة مصر ... هى تدوينات تم تدوينها على

مدونة فك زنقة

سوسة مصر ... المقصود بها هى الافكار الغلط

المنتشرة فى مصر .. فنحن عندما نجد احد الناس

يفكر غلط نقولته يابنى انت فى دماغك سوسة

سوسة مصر ... كتاب تتبابى ساخر

سوسة مصر ... كلمتنا اللى بنقولها

مصطفى محمد

Fak-zanka.blogspot.com



سوسة مصر